

清史列傳

冊五

清江先生集

卷之三

裝飾送禮

屏聯堂幅

本局用新法鋸版玻璃版，精印明清
現代名人書畫之對聯屏條立軸條幅，都
三百種。選擇之精，印刷之工，裝潢之
雅，售價之廉，早已全國馳名，推為獨
步一時。花廳客堂書房臥室懸掛者，無
不應有盡有。送喜禮、壽禮、年節禮、
開張禮，尤屬價廉物美，雅俗咸宜。較
之自行撰寫者，省力省費，更覺雅觀。

對聯每付僅售
一元左右屏條
每堂僅售二元
至五元左右立
軸堂幅每張僅
售數角至二元
左右均已裱好
另有詳細目錄
函索即寄

中華書局發行

藍天

清史列傳 卷五

大臣畫一傳檔正編二

范文程

范文程瀋陽人曾祖鑑明嘉靖時官兵部尙書祖沈瀋陽衛指揮同知父楠未仕文程少好讀書穎敏沈毅與兄文案並爲生員天命三年大兵克撫順文程年二十有一太祖高皇帝見而器之召與語知其熟於當世之務使隨行及取遼陽度三岔攻西平下廣寧皆參謀帷幄天聰三年以文館官從太宗文皇帝伐明入薊門克遵化招服潘家口馬蘭峪等五城會我師在大安爲敵所圍文程以火器進攻圍解太宗自將臨永平令守遵化敵兵掩至文程率先力戰敵敗走論功授三等輕車都尉世職五年師圍大凌河城文程招降西山一臺命卽統其衆六年太宗詢廷臣伐明之策文程與寧完我等言我軍如欲深入當乘其無備直抵北京訊其和否毀山海關水門而歸以壯軍威計所從入惟雁門關爲便並諭沿路軍民俟版圖歸我酌免賦稅示愛養意太宗嘉納之崇德元年授祕書院大學士初

八旗置都統衆議首推文程太宗曰此職一軍耳朕方資爲心膂其別議之時文程所領皆樞密事每入對必漏下數十刻始出或未及食息復奉召入凡宣諭各國敕書率撰擬以進至是改文館爲內院遂有是命八年世祖章皇帝嗣位命以其族屬隸鑲黃旗順治元年睿親王多爾袞將統兵伐明文程上議曰迺者明之流寇煽亂其君若臣不能相保雖天數使然良由我先皇帝憂勤肇造諸王大臣夾輔沖主忠格蒼穹上帝潛爲啓佑也竊惟承丕業以垂休萬禩者此時失機會而貽悔將來者亦此時何以言之中原荼苦已極黔首無依思歸令主以圖樂業明之受病已不可治其土地人民不患不得患得而不爲我有耳曩者棄遵化屠永平一再深入而返彼以我爲無大志縱來歸附未必撫恤因懷攜貳今日有已服者有未服宜撫者是當申嚴紀律秋毫勿犯復宣諭以昔日不守內地之由及此行或直趨北京或相機攻取必於山海長城以西擇一堅城頓兵而守以爲門戶惟諸王察之大軍遂發文程從師渡遼河明山海關總兵吳三桂以闖賊陷北京來乞師文程曰自闖寇猖狂中原塗炭近且傾覆京師戕厥君后此必討之賊

也我國家上下同心兵甲選練誠聲罪以臨之恤其士夫拯厥黎庶兵以義動何功不成乎復言好生者天之德也兵者聖人不得已而用之自古未有嗜殺而得天下者國家欲統一區夏非乂安百姓不可於是申嚴紀律妄殺者有罪既敗流賊二十萬於山海關我兵長驅而西民多逃匿文程草檄宣諭曰義兵之來爲爾等復君父仇所誅者惟闖賊師律素嚴必不汝害民心遂安師入北京建議備禮葬明崇禎帝時宮闕灰燼百度廢弛文程收集諸曹冊籍布文告給軍需事無巨細咸與議焉明季賦額屢增而籍皆燬於寇惟萬曆時故籍存或欲於直省求新冊文程不可曰卽此爲額猶恐病民豈可更求哉自是天下田賦悉照萬曆年間則例徵收除天啟崇禎時諸加派民獲蘇息二年正月敍功晉三等男十月江南旣平上疏言治天下在得民心士爲秀民士心得則民心得矣宜廣其途以蒐之請於丙戌會試後八月再行鄉試丁亥二月再行會試從之三年四年兩充會試主考官五年晉一等男賜巴克什號六年正月充纂修太宗實錄總裁官二月復爲會試主考官七年遇恩詔加一雲騎尉世職八年正月晉二等子閏二月大學士剛林以黨附睿親王多爾袞獲罪其刪改太祖實錄辭連文程並議罪先是三

年二月睿親王誠大學士等宜時具條奏文程以凡有聞見卽面啟無庸具本對
王曰爾素有疾毋過勞自後可早出休沐逾數月甘肅巡撫黃圖安請終養部議
借端規避應革職文程白鄭親王濟爾哈朗曰終養乃人子至情不宜如部議睿
親王怒其不先自己也下法司論罪旣而釋之後文程因不合睿親王意時稱疾
家居至是世祖以文程在盛京時不附貝勒碩託後亦不附睿親王衆所共知免
其罪革職留任未幾復原職九年遇恩詔晉一等子十月任議政大臣疏曰臣見
直省土地荒蕪賦虧餉絀國家大害在此然軍屯可興國家大利亦在此昔明太
祖嘗言養兵百萬不費民間一粒亦當元季亂後地曠行屯故耳今湖廣江西河
南山東陝西五省寇亂日久人民稀少請設興屯道綜理之同知分理之地之無
主者卽爲官屯其有主而拋棄者多方招徠過期不至乃爲官屯凡土著流戶願
來耕者均給以地量助牛種官分子粒三之一三年後爲永業編行保甲使守望
相助其無本者官給僱值則遠近饑民聞風踵至亦救荒之術也初屯之時所收
糧草皆道廳留貯出陳易新爲次年加墾計其難久存者就近撥供兵馬僱舟車
起運勿僉點屯民動用屯牛則屯事得永久矣又興屯之處府縣有司聽屯道提

調理屯同知惟屯道管轄如開墾日增撫按特薦倣邊俸例三年陞二級以酬其勞其不職者嚴糾之所當信賞必罰也疏上命諸王大臣會議舉行十一月以科道官當睿親王攝政時劾大學士馮銓降革者彙原疏進呈御覽世祖曰諸臣所劾誠當何爲以此罷耶文程曰諸臣疏劾大臣無非爲君爲國皇上當思所以愛惜之世祖遂諭吏部俱以原官起用十年請令部院三品以上大臣各舉所知不論滿漢不拘資格不計親疏取正直才守之人堪任何官列疏奏聞一官司可舉數官數官可舉一官將姓名彙置御前不時召對察其議論核其行事遇缺請旨簡用若用後稱職保舉官加以優典否則量罪連坐詔允所議十一年八月加少保兼太子太保時遣官赴各省恤刑因疏言前此遣滿漢大臣巡方慮有擾民是以停止今四方水旱災傷紛紛見告亦應請停止其見禁重囚敕各巡撫詳勘以可矜可疑者奏聞裁定從之九月以疾乞休奉諭曰大學士范文程任事多年忠誠練達朕所倚賴乃近以積勞成病未得旦夕奏效深繫朕懷暫令解任調攝俟病痊召用特晉太傅兼太子太師頻賜藥餌存問十四年詔晉秩一級圖其像藏之內府聖祖仁皇帝嗣位奉命祭告太宗山陵康熙五年卒年七十賜祭立碑謚文

肅五十一年御書元輔高風以額其祠文程經事四朝寵錫優異在盛京時列聖皆呼其官而不名以其形貌頗偉所賜衣冠皆特製居恆言治天下惟在得賢庶官有才者不以一眚掩湔除拔擢時爲奏請焉謝政後居別墅中以詩書騎射教子弟性廉慎樂施與器量淵深人莫窺其喜怒子六人承斌襲一等子爵承謨承勳別有傳

額色赫

額色赫滿洲鑲白旗人姓富察氏世居納殷祖莽吉圖當太祖高皇帝時隨其兄孟古慎郭和來歸額色赫初事太宗文皇帝由護軍校屢從征授兵部理事官天聰九年隨副都統巴奇蘭征黑龍江先還奏捷崇德三年擢祕書院學士五年齎敕赴錦州諭睿親王多爾袞進兵機宜會都統圖爾格敗明兵於木輪河額色赫以捷還奏六年三月同內大臣圖爾格大學士范文程剛林等往訊圍錦州大軍離城遠駐遣兵歸家等狀王貝勒大臣皆服罪降罰有差八月明總督洪承疇率衆十三萬援錦州至松山額色赫受上方略往諭統軍王貝勒等尋還奏敵勢甚衆宜益兵上遂統師親征擊敗之七月鄭親王濟爾哈朗克錦州祖大壽降額色

赫至軍營宣諭慰撫降衆八年隨貝勒阿巴泰征明至山東下兗州同參領穆成格等奏捷世祖章皇帝順治元年隨大軍入關定燕京二年敍功授騎都尉世職四年考滿加一雲騎尉五年遷刑部啟心郎八年擢國史院大學士九年充纂修太宗文皇帝實錄總裁官會試正考官列議政大臣復充武會試正考官屢遇恩詔晉世職至一等輕車都尉十二年加少保兼太子太保再充會試正考官時方纂輯太祖太宗聖訓又奉諭取經史中忠臣孝子賢人廉吏之事蹟語言分類採輯成書名曰資政要覽額色赫充總裁官十三年敕使朝鮮鞠獄是年考滿晉少傅兼太子太傅廕一子入監十五年改保和殿大學士十六年詔獎奉職勤勞諸臣晉少師兼太子太師十八年十月卒

寧完我

寧完我遼陽人天命年間來歸事貝勒薩哈廉隸漢軍正紅旗太宗文皇帝召直文館尋授參將天聰四年大軍破永平命同館臣達海等執黃旗登城諭士民安業尋隨貝勒阿巴泰等守永平又從征大凌河及察哈爾並招撫有功授騎都尉世職五年十二月上疏言臣蒙皇上出之奴隸登之將列不揣庸愚妄自期許初

被召對輒薦五人復公疏請立六部設言官今六部已立不設言官者意以爲國人皆得進言耶又或謂南朝多設言官竟致敗壞耶臣請明辨之我國未立六部之前臣不具論自六部既立之後曾見疏劾人罪者否今日秉政之人豈盡循良方正在屬下者既不敢非其官長旁人又誰敢輕議權貴古云兼聽則聰偏聽則蔽若設言官人必自斂君身尙許諍諫他人寧知忌諱此古帝王明日達聰之大用也南朝之言官壞事由伊主之鑑別不明非洪武定制之不善臣自揣無經緯之才惟忠耿之心至死不易今再行奏聞以明始終無欺不勝悚慄之至六年六月與范文程馬國柱疏陳伐明之策九年二月言頃奉聖諭各舉薦賢能以供任事孰意無知之輩反假此爲倖進之階臣思之古薦賢之條功罪連坐所以杜弊端而防冒濫伏願再頒明詔自後所舉之人或效能敍功或僨事獲罪皆令舉者同之若其人抵行於厥初改節於末路許舉者隨時檢舉乃免連坐如此庶人知畏法而所得皆眞才矣太宗並嘉納之十年二月罷職先是完我留守永平以好博爲禮部參政李伯龍等所訐奉諭諱誠宥其罪至是復與大凌河歸附參領劉士英博爲士英家人舉發論罪革世職凡恩賜莊田奴僕悉入官遂閒居數年世

祖章皇帝定鼎後起用爲學士順治二年五月授宏文院大學士充明史總裁官
二年至六年三充會試主考官又充纂修太宗實錄總裁官並繙譯三國志洪武
寶訓諸書告成賜賚優渥授二等輕車都尉世職八年遷國史院大學士十年四
月內院以完我與洪承疇等班位祿秩應否照漢官例奏請完我獨承旨照滿洲
大學士例尋授議政大臣十一年三月疏劾大學士陳名夏曰古來奸臣賊子黨
不成則計不得行欲成奸黨附己者雖惡必護異己者雖善必仇行之久而入黨
者多矣始也借人以引已繼也納賄以引人若非確訪其鄉評輿論實察其居心
行事則黨固而莫可破臣自念壯年疏庸貪博辜負先帝一廢十年皇上定鼎燕
京復得隨入禁地矩趨公署凜守臣職者又復十年於此愚直性生遇事勃發雖
不敢行埋輪補牘之事若附黨營私以圖目前富貴寧死不爲痛思人臣貪酷犯
科國家癱瘓之疾不足爲慮惟懷奸結黨禍關宗社患莫大焉陳名夏奸亂日甚
黨局日成臣不憚舍殘軀以報答聖主並列其罪狀請敕大臣鞠訊事詳陳名夏
傳八月加太子太保十三年考滿加少傅兼太子太傅十五年九月以老乞休奉
諭大學士寧完我效力多年勤勞素著今因年邁有疾令原銜致仕以遂頤養康

熙元年聖祖仁皇帝念其贊理機務年久命以一子補用學士四年四月卒賜祭立碑謚文毅

覺羅巴哈納

覺羅巴哈納滿洲鑲白旗人景祖翼皇帝第三兄之四世孫也年十七卽效力戎行屢從大宗文皇帝征伐著有功績天聰八年授騎都尉世職九年命免功臣徭役並分設佐領巴哈納與焉崇德三年授刑部理事官明年擢本部參政尋兼正藍旗滿洲副都統七年以刑部失勘違禁出邊之布山罪又拒戰錦州之護軍阿桑喜自陳戰功於法司巴哈納審斷不公革世職留副都統任八年七月論登州略地諸將罪巴哈納以倡議令軍士皆歸坐奪所俘獲論罰如律順治元年四月擢正藍旗蒙古都統尋調滿洲都統六月與都統石廷柱徇霸州滄州德州臨清皆下之七月詔平山西遂移師會都統葉臣軍遣使招降明總督李化熙等十一月同石廷柱師自汾州趨平陽大敗賊兵於西山寨俘斬甚衆降僞副將三員至黑龍關降明守備三員綜計得降卒六千餘人以功賚白金授三等輕車都尉世職三年九月隨肅親王豪格剿流寇張獻忠於四川分兵討平遵義夔州茂州諸

路斬僞官數百員降甲士數千獲馬騾輜重無算餘寇悉平五年二月以前討張獻忠時護軍統領哈寧被圍護軍統領阿爾津蘇拜援出之參領希爾根遲留不救及師旋希爾根冒功妄爭巴哈納勘察失實又肅親王欲以有罪揚善之弟機賽爲護軍統領巴哈納與議政大臣索渾不爲阻止扶同進奏廷議革職解任得旨改降世職爲騎都尉尋擢戶部尙書八年正月世祖章皇帝旣親政巴哈納入奏事畢上詢民間疾苦及國家無益之費巴哈納以遣官採辦臨清甌分派漕船載運通州由五閘撥運供用對遂奉諭永行停止二月兼正白旗滿洲都統四月駐防佐領碩爾對訐告戶部給餉不均下法司鞫問部議巴哈納阿附睿親王私厚白旗兵丁給餉不絕刻待黃旗兵丁屢請不發應論死籍沒上命免死革世職罷任籍沒家產三分之二明年十月起授刑部尙書十一年二月同諸大臣命分賑畿輔賜敕印以行八月上嘉其素效忠勤始終不渝特晉太子太保明年三月加少保兼太子太保五月晉少傅兼太子太傅授弘文院大學士十五年改中和殿大學士十八年復設內三院仍授祕書院大學士康熙元年兼鑲白旗滿洲都統五年十二月卒康熙八年五月巴哈納子巴什訴言巴哈納自十七歲效力行

陣歷四十三年因與鼈拜遏必隆不和不給謚號不與立碑部議給予祭葬得旨巴哈納准予謚尋贈少師兼太子太師賜祭葬如典禮謚敏壯

車克

車克滿洲鑲白旗人姓瓜爾佳氏世居蘇完祖高皇帝時來歸父席爾那任佐領既卒車克仍其任兼前鋒侍衛天聰八年從上征明由大同趨懷遠薄左衛城與前鋒統領圖魯什等設伏敗明總兵曹文詔騎兵略地越代州百餘里至五台山還遇明總兵祖大弼兵二百餘擊敗之並多斬獲崇德三年授戶部副理事官會戶部承政韓大勳私取庫金事覺以前此貯庫時車克失記冊檔論罪應死上命免死罰錢仍留部用尋兼任參領五年鄭親王濟爾哈朗率兵圍錦州令車克同前鋒統領勞薩等領兵三百設伏高橋北以縱敵弗擊議罪籍家財半六年復赴鄭親王軍攻圍錦州破明總督洪承疇步兵三營世祖章皇帝順治元年從大兵入關擊敗流賊李自成二年敘功授騎都尉四年考績以車克在戶部能任事加一雲騎尉五年擢本部侍郎隨英親王阿濟格征大同叛鎮姜瓖車克分兵往援太原與巡撫祝世昌合謀遣兵剿除餘黨劉遷萬鍊等壞尋伏誅七

年兼任正白旗副都統兩遇恩詔晉世職至二等輕車都尉八年三月解侍郎任
改都察院參政四月駐防河間佐領碩爾對訐戶部諸臣給餉不均下法司鞠實
由尙書巴哈納主議車克前任侍郎坐附和降世職爲雲騎尉九月擢戶部尙書
明年列議政大臣遇恩詔晉騎都尉十年上以車克前此降世職處分過重仍復
二等輕車都尉十一年八月上嘉其素效忠勤任部務著有勞績特加太子太保
十二年擢祕書院大學士晉少保奉命輯太祖太宗聖訓充總裁官十三年三月
自陳學識疏淺未諳祕書院事請罷大學士任上弗允諭吏部曰戶部尙書職司
國計倚賴非輕必得精敏練達之才方能勝任大學士車克向任司農廉勤夙著
着晉少傅兼太子太傅仍管戶部尙書事十四年考滿加少師兼太子太師十六
年奉命赴江南督造戰艦十七年同安南將軍羅托統兵剿海賊鄭成功十八年
聖祖仁皇帝卽位車克奉詔還京調吏部尙書先是旗人阿那庫與其兄金布爭
產奉有諭旨均分阿那庫旋以金布隱匿婢女三人訴戶部車克以婢舊爲金布
所有於分產無涉置弗理阿那庫復與本旗佐領吉詹爭論吉詹以阿那庫違旨
妄爭牒戶部車克移牒刑部遂坐阿那庫違旨罪論絞致阿那庫妻擊登聞鼓訟

冤詔所司勘議阿那庫違旨之罪得釋車克應革任罰緩詔削加銜免革任康熙元年復授祕書院大學士六年以疾乞休詔以原官致仕十年六月卒予祭葬如典禮賜謚文端子渥爾敏襲職

明安達禮

明安達禮蒙古正白旗人姓西魯特世居科爾沁父博博圖太祖高皇帝時率七十餘戶來歸卽授爲佐領俾轄所屬太宗文皇帝天聰元年隨征明錦州歿於陣予三等輕車都尉世職明安達禮襲兼管佐領崇德三年任護軍參領隨貝勒岳託征明由密雲東北毀邊牆進同都統伊拜擊敗明太監馮永盛兵攻克南和縣六年隨大軍圍錦州敵據山巔列陣明安達禮率所部護軍衝擊敵潰遁松山敵騎來犯復擊敗之我師鑿壕駐守敵兵出錦州城奪橋明安達禮擊卻入城上親督師敗明總督洪承疇三營步兵明安達禮奮勇力戰又擊敗敵騎敍功晉二等輕車都尉七年冬隨貝勒阿巴泰征明薊州薄燕京破明總督趙光抃軍又同前鋒統領阿山擊走三河縣步兵進略山東八年春師還明總兵白廣恩張登科和應薦等巡哨螺山明安達禮率所部擊之潰又同護軍統領鼈拜破明總督范志